



Хор: Геннадий Кельчин

Ялап тадан этты ялап верат

Хащам тадан муң ханшилдысув, муй хорпи верат ялап тад кеша постасайт. Ин па ханшлув нумты ураңан. Нумастэман, щипорайн кашц хоят нумты питал, па молты вер сахат утхота яңхилдыл.

Ялап питама тад вуш элды «Чумовой капитал» тащан яңхты ёх кимет няврэм сэма питтал вуш элды вуйдыты питлат. Мет олаңан там нётопса туп ар няврэмаң хотгэлат вуйдыты верытсат. Там нётопсая лоңадман улдат нюкет, парщин, улат, ухлат, кур, хотхар сохлат па па мосты пормасат. Дорвош районан улты мохет хот омасты пормасатан ортлайт, сохлат, картлункат, нови тут маты хошапатан, юх эватты картэтан, куран малайт.

Касдыман яңхам мохет, хой уншак куртата па вошата манлат, кочевой охан сохапталайт, ин 5000 солкува яң молтас щёрас хоят вуйдыл.

Ветеринарной хошапат ялап портунатан понман улдайт. Щипверан вулэт па ампат тумтакат питлат. Тови па сус леп кашц пуш портунаң хошапат мийдыты питлайт.

Тащан яңхты мохилув няврэмат, хой ашкуда юпийн ун тахая уталтыты манас, йи пуш 80000 солкува нётопсайн малайт. Щипохладан лув верытлат лувилала мосты луматты сохат па уталтыты кеша мосты пормасат лутты.

Ямальской колледж яма етшам няврэмат 100000 солкува ёша паятлат. Щип

веран сот балл шитты мосал. Лувилал уталтам нэңат па ёхат ищиты мойлапталайт.

Мис йиңк ин куртаң хоятат ищи ёша паятты верытлат молочной сертификат онтасан. Лув куртэлан ки антом, па курта яңхты верытла па щита вуты. Там едпийн верытысат леккар хотатан вуйдыты.

Ай куртат элды, хота 500 хоят элды шималшак ул, лувилала рахты курта па вошаманты верытлат. Соцнайм щип

ран улам хоятат ищи хорпи улты хотан маты верэл ул. Кашц хоят вер атэд вантла. Касалты порайн 100000 солкува нётопсайн малайт.

Леккарат, няврэмат уталтыты нэңат-ёхат, ТЭК хоца рупитты мохет, хой колледжан рупитал ялап тад олаңмет хатд элды йи миллион солкува нётопсайн малайт.

Вой леккарат ищи нётопсавуты питлат. Ветеринарный фельдшер 500000 солкува нётопса вулат, ветеринарной врач – 700000 солкува.

Хащам ятан округ губернатор Дмитрий Артюхов постас, хой хольмаң тад унты няврэм тайты ки питал, щипнэ худам миллион солкувайн мада, хольмаң тад молтаса ювам нэңат йи миллион солкувайн маты питлайт.

Няврэм сэма питты порайн леккар хотан мойлапса даращат мийдылайт, щипорайн ант мосал нумасты, няврэм муйн луматтаты. Олаң сыс сохан тарамлайт. Щипит, ма нумастэман, шеңк ям вер.

Муй хорпи ялап нётопсайт Овс мув шимлаң мир хоятат ураңан па постадайт, муң па ишан па ханшлув.

Аллина Тоярова
ханшам потар



Хор: Альбина Тырлина



Хор: Воя Курьямова

Кадаңаң нэңхэт емаң хатлат лавсайт

Ямал мувна Кадаңаң нэңхэт емаң хатлат 2025-мет тал педа лавсайт. Щит пушци Овс мув шимдаң мир верат пидна ропытты департамент эвалт лавса.

Кадаңаң нэңхэт кат тылащ сыс емаң хатлат мантэл порайна вул ватна, похлатна уйтантыта па каста питлат. Мет алаңна Кадаңаң нэңхэт Надым васна актащдат, курк тылащ 22-23-мет хатл 2025-мет тална, щита ХХІХ Ямал мув губернатор Кубок ораңна каста питлат.

Надымской район Ныда, Нори па Кутопьюган похлатна Кадаңаң нэңхэт емаң хатлат ай кер тылащ 15-мет хатлна па ун кер тылащ 12-мет па 19-мет хатлатна. Пуровской, Лорвош па Красноселькупской районатна ай кер тылащна манта питл: Тарко-Сале – 1-2-мет хатл, Харампур похална – 12-мет, Мужи – ай кер тылащ 14-15-мет хатл. Ратта – ай кер тылащ 15-мет хатлна, Халясавэй – 21-мет хатл, Ханымей па Толька – 22-мет, Самбург па Красноселькуп – 29-мет хатл.

Ай кер тылащна вул васат ищи сансна ант



Хор: Вера Лонгортова

хыщдат: 8-9-мет – Новый Уренгой, 15-16-мет – Ноябрьск, 22-23-мет – Пулцаватна, 29-мет хатл – Муравленко васна. Охсар па Тазовский похалңанна Кадаңаң нэңхэт 29-30-мет хатл актащдат.

Ун кер тылащна: Антипаюта – 10-11-мет, Гыда – 17-18-мет хатлңан. Яр-Сале – 5-6-мет хатл, Сеяха – 19-20-мет хатл, Новый Порт па Панаевск – 12-мет хатлна.

Там лавам хатлат холна пидатта веритлайт, там ал предварительной датайт, ванамата питтэлна вантта питла мала хорпи турам щит хатлат олта питл.

Вера Лонгортова хансам потар

Сэма питам хатлаң постас



Хор: vk.com/maty_queen

Ван хатлаң тылащ хольмаң педа хулмет хаталан Иосиф Никифорович Куртмямов сэма питам хатлаң постас. Там хащам 2024-мет талан лув ярсот педа вет тада йис. Там хоятэв айлат ёх элты куца ёх унты иса ям ясаңан нумман тайла.

Ханты куртан удман, ай тэлан хул-вой велпаслаты хошас. Хутхошъяң тал элты вуды хотан тащ шавиты хоята рупитты питас. Ар тал хулмет тащ хот куца

ус. Рупитмал пораялан, тухал тал вулэң тащад нял щёрас унты энмилдыйс. Ин там верал хилдылалан елды тула.

Зоя Ивановна ийимел пидан щутщаты манман юпийн, Мужи воша нык охалсаңан. Иосиф Никифорович рупатайды куртан па ант опсас: холпат хушас, дохат, дупат, хуванат верас. Веңдала па хилдылала велпаслаты нётас.

Рупитмалан, ар пуш ишакты нэпекатан юкантиса, мевал посат тайл. Сэма питам хатлаңан, Лорвош район утхот элты, совет ветеранов, район па совхоз куцайдалан ар мойлапса ясаңан ястаса, мойлаптаса. Сама мосты ям хоятэл шавиман, няврэмдал па хилдылал иса лув пуңдалан улдат.

«Аспохие, сыстам турам еша па елды педа ваталты, улты нопсэн так ат ул, ясцен торлы ошаңа тайи, эвидана еша кум, тамаш ям улапсайн еша па верита», – Наталья Александровна Горшкова асэведан мойлапса ясаңан ястаса.

Муң па газетаев хуват Иосиф Никифорович мойлапса ясаңан китлэв. Уна ювам юпийн, тумтак уда, ёшңалан, курңалан щём ат тайлат. Ван рут хоятлана амат тувман, Турам Ащийн постам талдан, Калтащ Аңкийн партам юшен, патэл унты шуши.

Зоя Куртмямова ханшам потар

«Овс мувем ма самеман» вантопса манал

Пулцават вошан «Окружной Дом Ремёсел» хотан «Овс мувем ма самеман» ханшам хорат вантопса лэсятман ул. Сита Дарья Вануйто па Анастасия Хороля ханшам хорат эталтылайт.

Анастасия Хороля Панаевск вошан сэма питас. Ай пора элты хорат ханшас па ёнтасас. Ямальской многопрофильной колледж «ИЗО – графический дизайнер» специальность щиран уталтыйс. Си пора элты архорпи проектат, вантопсайт хося касас.

2019-мет тал элты хоят веншат ханшты питас. Олда кинайт хося эталтыты хоятат. Си юпийн хорат хуват, духасдал, рутдал нэпекан эталтысды. Хасям талан хилэл хор ханшас. Арпелак рупатайдалан няврэмат эталтыйл. Там йисан лув лув сиралан рупитал, вантопсаятан, уйтантопсаятан касал.

Дарья Вануйто Тазовской районан энмас. Айтэлан самал рут мувал педа хошийс. Сишан ханшты хордалан Овс мувал эталтыйл. Лув па Ямальской многопрофильной колледжан уталтыйс. «Художник-живописец» специальность хуват рупитал. Ин лув «Надежда» творчество хота яңхты няврэмат хорат ханшты уталтал.

Си вантопса Ас потты тылась элты ялап тал тылась лапатхосьяңмет хатл унты манты питал. Си вантопсая яңхаты па хорам хорат вантаты.

Альбина Тырлина ханшам потар



ОБЪЯВЛЕНИЕ

СЛУЖБА
ПО КОНТРАКТУ
В ВС РФ

ПОЛНАЯ ИНФОРМАЦИЯ ПО ТЕЛЕФОНУ

8(902)81-6-11-90

ЗВОНОК ПО РОССИИ БЕСПЛАТНО

ВРЕМЯ ДЛЯ
ВАЖНЫХ РЕШЕНИЙ!

КОНТРАКТНАЯ СЛУЖБА

5 000 000 Р

ЕДИНОВРЕМЕННАЯ ВЫПЛАТА

2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р
ЕДИНОВРЕМЕННО ОТ РЕГИОНА
ДО 120 000 Р
СЕРТИФИКАТ НА РЕАБИЛИТАЦИЮ

400 000 Р
МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ
ПРИ НАХОЖДЕНИИ В ЗОНЕ СВО

РЯДОВОЙ
ОТ 210 Т.Р

СЕРЖАНТ
ОТ 232 Т.Р

ПРАПОРЩИК
ОТ 292 Т.Р

Йидап щирна ропытта питл

Йидап тал тылащ аламет хатл эвалт Приуральской район леккар хат йидап щирна ропытта питл. Охсар похал районной центральной леккар хат Лапатнак леккар хат хоца лочал.

«Итта реорганизация етсата питас. Ялап тал тылащ 1-мет хатл эвалт муң Лапатнак лек-



Хор: Леонид Климов

кар хат филиал олта питлу. Нәңхэт элты ма дьтдам лавта, лув орцидална атам педа нэмоса ант кердал. Муң хоцев ропытты леккарат нох ант вудайт. Ант тайты леккарат Лапатнак леккар хат эвалт ёхтыдыта питлат. Тампус мули онколог ёхтыдыйс, папус па питл», – Охсар похал леккар хат вул леккар Владимир Баннов лавас.

Щитна, вул леккар лавты ясаңна, ант масл щит эвалт папта. Мала итта верла муң орцевна, щит нәңхэт ораңна мет ямас хайд.

Мет ям тахайи лавса

«Йиңкилор» овцебыкат мет па ар нәңху акатсат. Там тал сыс Кевна олты заповедникатна 4900 мув вантман яңхты нәңху ёхтыдыйс. Щит, хыщам тал эвалт кат пус ар – тунял 2647 нәңху ос.

«Йиңкилор» парк, мув вантман яңхты нәңхэтна мет ям тахайи лавса. Каман мув суң эвалт нәңхэт щит овцебыкат вантта ёхтыдылат. 2024-мет тална 29 овцебык посах сэмна питас, щит хыщам талат эвалт мет ар. Итта ертап лыпина олты заповедника 130 вай савиман тайла, ертап томпына – катсат молтас овцебык оллат.

2025-мет тална «Йиңкилор», «Юрибей» па «Ока» нәмпи ласкам станция волонтератна нампар эвалт сыстамтта питлайт.

Ай тэдна верта хасл

Муң тус ясаң ныңду тун каратлат, щипқан па ной эвалт йинтаслат, сох эвалт верлат. Лув ропатайдал педа вантман сам аматл. Маина Серасхова ай тэдна верта хасл, лув верты ропатайдал педа ки вантта, лавта рахал – сарнең яс тайты ның. Итта лув Охсар похална ол, верта хасапсэд ропатайи тайдалды.

Маина Ягиевна тамиты лавал: «Ма энмам мувам Пулъёхан овс мув, щита энамсам. Ащем Яги Александрович Серасхов, амэм па Татьяна Михайловна, олман хуват тащ савиман па хул велман осан, дьн эвалтыдан вантман муң тамащ ищки мувна олта онттысу.

Ма «Мастер декоративно-прикладного искусства» нэм тайдам. Мала эвалт аса йинтта веритдам, кадаң сох ат ол, ной ки ной, щипқан. Йинтаста ай тэдна питсу, амэв мала верл, муң па щит педа вантман самлу дьтлат. Ай итам иты ищити тун каратлам, йинтаслам. Яйдам па ащел педа вантман и охал, и нымал, и сатап верта хаслат. Йидап энамты нявремат ораңна итта щит сәңк щёкат. Муң орцилуна щит щёкат ропата ант ол, муң щиты онламан оллу.

Муң округу хуват мастерат ораңна каман сот уйтантопсайт верлайт, щити порайна мин итам пидна верам пормасламан пидна ярмаркайна ёхтыдылман, тынэсламан. Щиты актащиман йидап лохсат верта рахал, йидап ропатайт вантта, наң верам пормаслан эттада. Ал порайна ма пормаслам вантапсайтна китыдылдам».

Муң орцилуна, ханты маса – щит олапсы. Вай сох эвалт йинтаста, щит сәңк щёкат ропата, ның элты хаттэд нәңхулад соматтаты ораңна ар сох дэптамтта



Хор: Маина Серасхова

масл. Анта топ йинта, йинты масайдал хорамтта маслат, ванттына омащ ат ол. Йис тэдна этам щират-пищат верта хасты ныңат савиман тайдалдал па ищиты алнищ ат тулдал. Муң мувувна хонты харты ханты мур лув олапсэд ант ат ярэмалэд, нявремдал ат онтлатат. Тумтак яс, тумтак кур!



Нэпекат луңатты вер иса мосал

«Арсыр туса па умца ханшам нэпекат луңатты верат иса муң ай ёхлува мосты питлат», – щиты Суматвош районаң ай няврэмат ураңан верам библиотека хот куца нэ Надежда Буткова ястас. Щимащ верат ураңан ма нэман лувел потра хуцсэм па рупатайл элты тата инцассэм.

– Надежда Александровна, наң рупатаен элты матты айкел муңева тува.

– Тамхатл муң ай няврэмат ураңан пуншам киникайт луңатты Суматвош район библиотека хотэвн аратэди ма пилэман вет нэ ул па рупитл. Тата муң мин күтэвн вецката улдув, туңащира сыр-сыр верат, ияха номас тувман па ямсыева артадаман, лэцатлув. Арсыр ашкуда хотат пилн ар пелак рупитлув.

Ванта, Суматвошевн ай няврэмат уталтаты, щалта кутоп па коррекционной ашкудайт хув вушат элты улдат. Щитат тумпийн, хатл сис мет ай похиет-эвиет давалты хотат па тайлув. Щи тахаятн улты няврэмат пилн па кашң хатл сис сыр-сыр уйтантопсайт па алясапсайт ямсыева верлув. Мет одаң пораятн, ванта, унашак ювам па кутоп ашкуда хотэвн уталтаты похат муй эвет пилн рупатайт лэцатлув. Щий яңхлув па лый пилэлан арсыр поэтат па писателят элты тус па хорасаң айкедат тулув. Там йисн ар пелак ай ёхлув и пуша киникайт ант па луңатлат. Щи ураңан кушкепа муң дыеда ялап нэпекат оша пайтлув. Щалта «Ай хоятат» парламент нэмпи таха па вошевн ул па рупитл. Щи верэв онтасн муң арсыр ёнтотат лый пилэди кашң пуш верлув. Туп тата мосванан муң хоцаев рупитты нэңлув щий яңхты уншак похат-эвет пилн амапатщет манты щирн руц ясаңан лэцатам викторинайт хорасн лыв күтэди кассат. Щи касапсайң ёнтат елды ашкуда яңхты уншак няврэматн шеңк самаңа па мосман елды тайтыя питсайт.

– Ай муй уна ювам няврэмат нын районаң библиотека хотана ин яңхлат?

– Мет самаңа па мосман муң хоцаев рупитты нэңатн хатл сис давалты хотата яңхты ай няврэмат тайдайт. Щи ай пошхиет лый иса кашң хатл етна пелка даваллат, дулан дыеда сыр-сыр ялапа этам киникайт луңаттыя.



Н.А. Буткова – Суматвош районаң ай ёх ураңан верам библиотека хот куца нэ.

Щалта па мет одаңмет клас-сата ай ашкуда яңхты похат муй эвет ищиты муң хоцаева ёхтыдылат. Лый, ма щирэмн, шеңк самаңа там библиотека хотэв тайлат. Кашң щутщаттыя питам хатлатн ай няврэмат аңкиладн-ащилалн муң хоцаева тутлидайт. Тата лый иса сыр-сыр умащ па ошхуль монщат муң элтаева худантлат, арсыр верат оша пондат. Муң библиотека хотэвн тухал пораятн киникаяң вантапсайт лэцатлув. Щалта па ай тахайт потты тыдащ одаңмет хаталн ищи пирщамам хоятат емаң хатл порыдылув. Щи хаталн муң хоцаева мет ай няврэмат уна ювам хоятат пилн ёхтыдылат.

Ас нопатты тыдащ кутапн па хотэл ёх емаң хатл посталув. Щий ищи вошев элты улты няврэмат ун хоятат пилн яңхлат. Кашң щимащ вер муң хоцаев умащ туд па туп нох аматлилув.

– Муйсыр киника ханшты ёхат там йисн вошаң няврэматн самаңа тайдайт?

– Муң хоцаев там талн ай няврэмат шеңк яма Людмила Кошиль ханшам «Люцкаен портат» нэмпи киникайт луңатлат. Имолты ишан библиотека хот хоца рупитты нэңлув лый пилэди литературной уйтантопсайт туса лэцатсат па щи нэ ханшам потраат элты сыр-сыр айкедат версат. Щи пораятн кашң ай похие-эвие ар пуш муңев инцасас, муй щирн па хоты ин Людмила Кошиль щимащ умащ муй хорамаң потраат ай няврэмат ураңан ханшас. Щиңанща щи киникайт ханшты нэңев тумпийн, муң арсыр писателят элты ищиты ай ёхлува сыр-сыр мосты айкедат пораятн лэцатлув. Щи ураңан ай хоятата библиотека хотэва куш катра муй там йисн шеңк умащ яңхтыя па киникайт луңаттыя.

– Надежда Александровна, ялапа ханшам нэпекатн муйсыр тахайт элты нын кашң тал сис мадайт?

– Там йисн ялап киникайт моцатты вер шеңк лавартаңа йис. Туп и тухал пораятн Югра

мувев государственной библиотека хотэв элты округев доватн улты писателят ханшам ялап нэпекат муң хоцаева китдайт. Щалта па арсыр поэтат муй писателят Суматвоша ёхтыдылат па литературной уйтантопсайт верлат. Щитат юпийн лый ищи мортаң киникайт библиотека хота мойдадат.

Ёхи хащам талатн писателят иса ант па яңхлат муң хоцаев. Щи ураңан иса муң щи ар пелак вошаң няврэмат пилн рупитлув па округев доватн улты киникайт ханшты хоятат элты арсыр айкедат верлув. Шеңк ям, хоты наң тый ёхтыдысан па муң няврэмлув пилн литературной уйтантопса лэцатсан.

Ма нумагтэмн, щит куш ай няврэмат, куш уна ювам хоятат шеңк самаңа наңен худантсат па арсыр умащ верат наң элтаена там щёсатн оша версат. Ма щирэмн, тамащ уйтантопсайт елды па лэцаттыя мослат!

Нэпекат луңатты вер иса мосал па муң рупатаев ай ёхлува ищиты елды пелда шеңк мосты питл.

**Владимир Енов
ханшам потар**



Ма нюки хотн сэма питсам



Хор: dzen.ru



Хор: Людмила Шульгина

Щиты ястас Матрёна Ивановна Ким (Попова) – Поднават куртаң ими. Там тал дув Ас потты тыдац 16-метан 81 тала йис. Ма дув пилэдн Поднават куртан уйтантыйсам, мойна аңхсам.

Шай йинцман дув улапсайл элты потартас:

– Ащем Иван Абрамович Попов – Касум куртаң саран ху, антем Марфа Егоровна (эви опрац нэмал Артеева ус), дув Коми АССР мув элты ус. Дын Касум совхозн вулы тац лавадсаңан. Муң семьяевн 13 няврэм ус, ма – 12-мет, ин туп ма па мет ай ащем Георгий хацсамн, дув Ярославль вошн ул. Муң холдыена касалман сэма питсув. Ёдн туп саран щирн потартсув.

Ун яйдам па опидам ашкулдайн уталтысат, щирн манэм руц щирн потарты уталтасэл. Ма 9 тала ювмеин туп ашкулдая масайм. Щит 1952-мет тал ус. Олаңмет уталтам нэнем Фаина Лаврентьевна Кауртаева яма нумлэм. Дув нявлак сампи имия ус. Муң саран мир, Касумн интерната улты-холты ант вусаюв, щирн антем-ащем Касума касалсаңан, куртан нюки хот омассаңан. Нюки хотн усув, щиты ашкулдая яңхсув. Щалта ащем Касум колхоз элты йира манас, па муң вулы ухлатн Поднават курта касалсув. Щит ун кер тыдац 1954-мет тал ус. Ма шеңк ищкийн потсайм, хув лекцитсайм. Ащем кат щёрас солкува союмная ох вус, хот па мис дутас.

Матрёна Ивановна ясңал щирн, щирн порайн ашкулда куца Иван Федотович Пермьяков ус, дув имел Августа Фёдоровна няврэмат руц ясңа па литература уталтас. Щирн порайн няврэмат ашкулда кур адты ураңан ун ёх хоятата тут юх сэварты нётсат. Нови тут антом ус, щирн класс хоца и керосин лампа ус, контрольной рупатайт ханшсат ки, кат-хулам керосин лампайн мийдысайт. Щалта нови тут тыйс, туп ил олты унты нови тут маты станция рупитас.

1962-мет талн Матрёна Попова яң класс етшаптас. Елды Омск вошн уталтыты нумасас, туп елды Топол воша манас, ванты, щий дунан тутаң хоп яңхас, талн – ай тохлаң хоп. Тата пединститут хоца яма экзаменат мас па няврэмат математика уталтаты вер оша верты питас. «Ма яма уталтысам, щирн 22 солкува 50 копейка стипендия ох ёша вусам. Ванты, муң семьяев ар няврэмаң ус, антем чумработни-чая рупитас, щирн рупата ураңан

нэмолты ох ант сохалтас. Щалта Поднават куртан ал рупатайт верас, шеңк ай тыдац ох тайс. Ащем щирн порайн щуттас – туп 19 солкува пенсия ох ёша вус. 1972-мет талн ащем антома йис, антема дув урцелан 19 солкува юкана туп 11 солкува маса. Щиты щирн даварта усув», – Матрёна Ивановна нумалмасды.

Пединститутн уталтымалн айлат Матрёна икеңа йис. Икел Олег Иванович Ким ищирн щирн институтн няврэмат физика уталтаты вера рупитас. Дув семьяевн Павел пох сэма питас. Елды нэпекаң катңан Ёмвош район Луговой курта рупитты китсайңан, туп Поднават курт ашкулдая математика па физика урокңан туты хоят антом ус, щирн дув айлат семьяев Матрёна рут куртэла ёхтас. Щит 1967-мет тал ус. Ашкулда куца ху Иван Федотович Пермьяков шеңк амтас, хоты дув уталтам эвел нэпекаңа йис па ёхды рут ашкулдаела рупитты кердас.

Матрёна Ивановна потартас, Поднават куртан мет олаңан

няврэмат Турам хот хоца уталтысат. Щалта советской лац порайн ашкулда хот омасса. Дув потартал: «Уйтлэм, 1938-мет талн тый ар мир нартамды китса, щирн ялап ашкулда хот омасса. 400-кем няврэм кат сменаин, етн ун ёх уталтысат. Ма ашкулдаевн куца лаңкар нэңа удмеин нумлэм, хоты 450 няврэм уталтысат, щит элты 150 шоши мир эви-пох интернатн усат. Ашкулда хотэв ай ус, щирн итухд ишн па хотатн, интернатн муй па экспедиция элты хащам сохат пусты хотн уталтаты верат лэщатсув. Иван Федотович Пермьяков ялап ашкулда омасты ураңан ун куцаята пицмайт ханшилдыс, иса муй верас, дудн соращак ат омасса. 1977-мет талн ялап ашкулда пуншса, туп дув щирн елпийн антома йис».

Щиты Матрёна Ивановна Ким 36 тал Поднават куртаң няврэмат математика уталтас, куца лаңкар нэңа ус. Щирн мосты рупата тувмалн ар ишакты нэпек тайл. 2002-мет тал вуш элты щуттал. «Щуттатэмн хот рупата вердам, дун порайн арсыр овощат, аня лыплат энмалдам. Икем па Павел ун похем антома йисңан. Там Поднават куртан Александр кимет похем ул, дув ван кутн мояңа ёхтылдыл. Хулам хилы тайдам, дув уна йисат», – ёхи хащам артан Матрёна Ивановна ястас.



Хор: Василий Петров

Мув нави ланцна лап лаңса. Дат энамты харат, орат, итта волк па сыстам вул луңатты нәпек лопас хорпет. Хой дув элтыдад ант манл, яспас понтал хорпи: «Тамац-тамац вай ёхтыдыс».

Хатл! Ланц манад. Етсал – па сыстам, нави страницайт. Алаңсахат орна ёхатдан – ка-ман хорпи калтам, вантта омащ. Щитна, ор тал ант ол, ваят дув олапсәд олат, навардат, нёхамтылат.

Масл сара вантта, мала щит щидиаш ант оцты посат, луңатта нәпек иты. Па ланц манл, па нәмоса ант хыңл.

Ор ваят тал порайна



Хор: gfhome.ru

Лаңки

Тал педа, ма хорам вурты альпаң хаптанам хаттар альпаң хаптан педа пилатлэм, юхат кутна ант нытэм ораңна. Луң па сус сыс, сәңк ар ханя таха ләщатлам. Нахрат, тутукуват акатлам, юх вусат, мув илпина ханятладлам. Мета маса сопаслам па ай войтна локки талдайт. Тохал ханя тахайдам пуцци ма па ярэмата веритлам, кул ланц кутна талан ант моцатладлам. Щиты ар пелак ярэматы нахарлам эвалт, щи юпина юхат энамлат. Талан ма ант хойдам. Сәңк так ицкетна юх оңх лыпина амаслам.



Хор: goodfov.ru

Савар

Ма, нави саврыйи, палдам сәңк хуват ант олат, еса алңищ лайдат. Ма сопас тал педа ант вердам. Хат ма ант тайдам, вус оңх па ант масл. Атам ваят эвалт хув курдамна нятлайм, холна ма палдам сәңк каләт. Кур патылам лопсахат, ланц илпина ил ант лоңлат. Дылды порайна па юх кар дыдам. Холна ма талан нави хаптан соматлам, ланц кутна век ант ныдайм.



Хор: vestivn.ru

Йиңк вой

Йина-йна, мойпар лавад. Хонты эдан луң хуват ар вой актас, щитна муң, йиңк войт, ицки, патам йиңкана ант патдаюв. Тал педа хатлуд ләщатлу, варсат артан акатлу.



Хор: prirodnaizoradmbmao.ru

Мойпар

Ма луңан па сусн вой акатлам – мув дэрат па рэх сэмат дыдам, нахрат пордам, вой-хул велдам. Щит манэм сәңк нятл ицки тал хатамна ямас хойта. Хатам ханя тахайна верлэм, ватна ил пайтам юх пуйтна. Хойта Ас потты тыдащна ләщатыдам, ланц питты алаңна. Ил хойтэм алаңна, ар калтам порантлам, ант моцаттэм ораңна.



Хор: market.yandex.ru

Кадаң порты вой

Ма па тал сопас ант вердам. Сусн хасам тал хаптан соматлам. Хатл так ицкетна кул ор кутна ханятыдам, вус оңхатна. Атна па велпаслата этлам. Вул вайт педа ияха актацман манлу. Ма курдамна лапатлайм. Тәдаң хонна, нәмоса ицки палтап ант ол.



Хор: Pinterest

Охсар ими

Ор лыпина ма мет хорасаң ныңийи. Хаптанам вурты, посэм хув. Кул пунна мули луң эвалт энамта питлайм, талаңты кулды Ас потты тыдащ па ван хатлап тыдащна йил. Талан дытыт моцатта сәңк щёкат. Ор талаңты нёхамтыта масл. Топ ма ищи век ант патлайм – ма пунам хув, хаптанам хасам! Нәмоса дылды пора эвалт ант палдам.

Донсяң эви мойлапса

Мет хув муван, монсяң унтан – мет хорамаң, восты сэмпи па нови охсохаң Донсяң эвие ус. Хой мет самаң па вецкат эвие пилан молты порайн уйтантайс, нэмолты порайн ант ёрэмалды. Хорам хораң нэпекат луңатты лув шеңк самаң ус. Кашң порайн нумасас, хоты ай няврэмата ям верат верты верытал.

Имолты порайн, Ялап тал емаң хатл ёхатты елпийн, Донсяң эвие няврэмата ант ёрэматы мойлапса лэсятты утсийс. Си ураңан лувела мет хув мува манты мосас. Сита мет волаң мутрайт верты хоят ус. Туп лув нётты верытас.

Самаң эвие си хоятал уйтас па лув элтэд нётапса вохас. Ястас, си мойлапса элты кашң няврэм ат худас. Икев хув нумасас, муй сирн эвия нётты. Хулмет хатл номасан ёхатса, мутрайт верты юхан мойлаты. Эвиет па похиет мет самаң, вецкат номаслад си юхие тыялты верытас.

Эвиева мутрайң юхиедан олты няврэмат туп восьхемиты мосас. Ялап тал емаң хатадан эвие няврэмат педа ишнет мохты вантас па юхиедан лув хосяед сякамтыйс.

Лув давдасас, ин кашң няврэм ялап ёнтотан, потарты аканятан, сора яңхты машинаятан, ар хорпи мавняняң мойлапсаятан ёхатла. Туп нэмолты ант тыйс, нэмолты ант этас. Ситадан, кашдыя ювам па метам Донсяң эвие ёхи манас па ил олас.

Хун алаңсахата йис, кашң та-



Хор: dzen.ru

хайн туп мойлапсайт элты потар манас. Няврэмием нэмолты ёнтотат, мавнянят элты ант нумасат. Лув утсисат, аңкидал-асидал лув пилэдан ат усат, яха пора хайсат, яха ёнтсат, яха каман шушидысат.

Сишан, хун Донсяң эви нох килас, сит шиялас. Няврэмат аңкидал-асидал пилан донсь

пулыетан ёнтсат, ухадан хатэмисат, етан па яха хошам кур пуңалан омасман, хорамаң нэпекат луңатсат.

Донсяң эвие самаң ойн хувласа, хун лув амтам няврэмием шиялас. Си пора элты эвиев кашң тал ар няврэм хося ёхтылдыл па номаслад тыялдалды.



Ицки Аки няврэмат

Ицки Аки хулам пох па йи эви тайс. Нэмлад – Вот, Еңк, Киярт па Донсь сэмие.

Йи пуш Ицки Аки няврэмлад вохсалды па ин-сясладды:

– Ешаул тада йил. Хой нын элтайн хоятата мет ун онтас тул, хой лувилада нётты верытал?

Няврэмлад мохты хоятата нётты мантсат. Пирась ики хув давдасас. Имолтыйн няврэмлад си ёхатсат па потартлат.

Мет олаңа Вотал потарты питас:

– Ма иськи хатлат хоятата китсам. Хоятат ат уятлат, тадэв си йил. Курлад ат алдылат.

Хор: dzen.ru



Еңкал потрал елды па тусды:

– Ма ёханат ходыена поталтаслам.

Киярт нюхмас:

– Ма па, унтэм шеңк хорамаңа версэм. Ин лув ал волийл.

Донсь сэмие па шитаман ястас:

– Манэма сикем мувев щала йис. Ма лувел иса донсян лаңксэм. Нови хошам соха думаттасэм.

– Ям си, няврэмиедам! Нын хол манэма яма нётсаты. Туп наң, донсь сэмием, мет такан нётсэн, – Ицки Аки ястас.



Ялап тал хорам пормасат, ёнттотат версайт

Кашң пуш Ялап тал емаң хатлатан, хоятат сют-сяты порайн, ар хорпи уйтантопсайт вердайт, кинайт эталтыдайт, няврэмат сютсяты харатан, мастер-классатан дэсятдайт.

Пулңават вошан «Дом Ремёсел» хотан Ялап тал сютсяты хатлатан ун хоятат па няврэмат ялап тал хорам хорат, пормасат, ёнттотат версат. Русь вератты хоятат кутан кашң порайн ханты тус хоятлуд дов, юх элты пормасат нёхардат, щашканын па нэпекатан хорам хорат ханшлат.

Симась тахаята яңхты хоятат аматман па ям номасан лув ёшладан ялап тал емаң хатла верам пормаслад, мойдапсайдад пидан ёхи мандат. Там лопасан сита верам хорат понтсуб, вантаты па умасьдыаты.

Альбина Тырлина
ханшам потар



Хор: Альбина Тырлина

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 0013

Подписные индексы:
на год – ПА700, на полугодие – ПР561

№ 2 (1253)

Газета вышла в свет 11 января 2025г.

Подписано в печать 9 января 2025г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

И.о. генерального директора

АНО «Ямал-Медиа»
Каврук
Татьяна Ивановна

Главный редактор

Яковлева
Алина
Кирилловна